



# PERSEVERA

#MYLEGACY

Pabien!  
50th ANNIVERSARY  
SCOUTING ANTIANO  
APRIL 2015  
LUNA DI SCOUTING  
MAS INFORMASION: WWW.FACEBOOK.COM/SCOUTINGANTIANO

#mita  
#SCOUT

APRIL 2015

UN PÁGINA DI KURASHÁMENTU I GUIA SPIRITUAL PA MIEMBRONAN DI SCOUTING ANTIANO  
EDISHON 51 AÑA 5

## Parábola di e trahadónan den hòfi di wendruif (Mateo 20:1-16)

**Reflekshon: Para firme**  
**Un moneda di plata pa dia**



Dios ta manera e doño di kunuku, òf di hòfi di wendruif ku ta buska trahadónan pa kultivá su kunuku. Tin di nan ku ta traha aden fo'i mainta tempran, fo'i hubentut mes; tin di nan ku apénas a drenta, i tin, ku ta para pòrnada ainda, ni maske e anochi di nan bida ta serka di sera. Ki bondat di Dios!

Ainda bo por drenta den su sirbishi, ainda bo por kuminsá traha den kunuku di Dios, den su hòfi di wendruif pa haña e mesun moneda di plata, e moneda ku ta simbolisá bida eterno.

E kunuku no ta leu. E ta den bo paden, den bo alma.

Tal bes e ta mas mondi ku hòfi, pero ta trata di kultivá e kunuku aki di bo propio bida. No warda mas, solo di bida ta bahando, ta último chèn pa gara e moneda di plata. Mira den bo paden, den bo bida pasa, den bo historia.

Mira den bo kustumbernan, bo relashon ku otro i bo relashon ku Dios. Tur kos a bira mondi?

Wèl, kuminsá chapí. Ken sa, tal bes bo por habri un pida tera fèrtil, unda e mata di wendruif por pega reis i ainda promé ku anochi sera lo bo disfrutá di e biña nobo. Hasi uso di sakramentunan pa kultivá e hòfi di bo alma. Den sakramentu di konfeshon bo ta ranka tur e matanan di sumpiña, tira nan afó.

Den sakramentu di Eukaristia bo ta fertilisá e tera ku sanger di Kristu i bo ta sembra su palabra. Den sakramentu di Santoli bo ta hasi kalor di Spiritu Santu madurá e drùifnan lihé.

Hopi di nos grandinan ta para pòrnada, ta gasta tempu den kasino, fiesta, 'cell phone' òf dilanti di televishon, ta dispidí e último chèn ku nan tin pa saboriá e bida berdadero. Drenta den kunuku di Señor promé ku solo baha!

## Pasenshi.....

Kuantu biaha a yega di sosodé ku bo ta warda riba un solushon pa un situashon, pero esaki ta keda sin resultado? Den e era nobo aki, nos a kustumbrá ku tur kos mester sosodé ku hopi pura.

Esaki ta pone nos lubidá ku Dios si, no ta traha riba nos velosidat.

Tin un dicho ta bisa:

'Dios su tempu no ta nos tempu'. Esaki tin di pone nos komprondé ku ora situashon bira pèrèmpèmpèn, no semper ta nifiká ku mesora un solushon lo sali. Loke si nos por

saka afó na momentunan asina den nos bida ta ku nos ta hañando un lès di Dios pa práktika pasenshi. Mas bo haña bo den pèrtá, mas lo bo por pone bo abilidad di warda na práktika. Asina ei, sin bo paga tinu bo bendishonnan lo bin mas lihé, situashonnan ferfelu lo resolvé i lo bo tin pas interno. Tur esaki simplemente pasobra ya bo no ta konsentrá riba bo problemanan. Ademas na e momentunan aki bo tin ku kòrda bo mes ku ora Dios ta ketu ta pasobra e ta preparando algu bon pa bo; hopi bes asta mas mihó ku esun ku bo a pensa bo mes.

E pastor i outor, Stan Toler a yega di skibi un buki ku ta hiba e titulo: 'God is never late; He's seldom early; He's always right on time!'. Kòrda ku pasenshi ta un virtud. E mester bira un parti di nos estilo di bida. Ya ku tur kos ku nos mester, nos lo haña na su debido tempu.

Afirmá esaki: Mi sa ku den bida tur kos tin su tempu. Mi ta warda ku pasenshi i ku konfiansa riba Dios.

Siñansa:

Warda trankil loke Señor lo hasi, sigui sper'É: E ta yuda. (Salmo 37:7)

Pero si loke nos ta anhelá ta algu ku nos no ta mira ainda, nos ta warda riba dje ku pasenshi! (Romanonan 8:25)

